

聖  
門  
人  
物  
志

聖門人物志序

聖門人物志者魏中丞意而郭憲使  
所緝也凡游聖門與私泚而得從祀  
者皆人傳其略而贊以詞其志博其  
裁衷逾兩月而告成問序於余余讀  
史至仲尼弟子傳何其略也稍可考

見者三十五人其餘名籍耳彼以為  
未睹厥容貌則論言其言大略皆出  
魯論非魯論而傳者其事不雅馴人  
物志乃出二千載後其人若新而言  
與事若昨列也彼專據孔氏古文而  
此編兼採百家衆氏執百家衆氏之

餘文為孔氏紀載十不得五然離百家衆氏而以臆意之十不得一夫其過而廢之也寧過而存之矧其未必過也吾以為為史紀簡不如為人物志詳史取據孔氏未必孔氏也孔氏弟子籍豈其諸弟子皆略而獨端木

氏詳此非端木氏而託端木氏以附  
於孔氏者也是詳與略兩失之也百  
家衆氏豈無託而附于孔氏者然而  
皆尊孔氏者也今人而未識其高曾  
者見其亟與游亟問焉得一語一事  
必謹識之此百家衆氏者或及與聖

賢同時或後之而猶得聞其風烈此  
亦學士大夫所宜亟問而謹識之者  
也是編也凡傳聖人之學祀於其庭  
者盡在是矣登其堂思其人其人亡  
而言與事存千百世而知其解者旦  
暮遇之也士希賢聖必從是編始後

之學者其無忘中丞憲使公之勤

賜進士出身詹事府少詹事兼翰林

院侍讀學士掌院事

國史副總裁直

起居注

經筵

講官馮琦撰



聖門人物志序

南樂魏中丞公奉

天子詔來填拊晉陽故事越三日謁  
先師廟藩臬諸大夫侍焉禮竟公顧  
詹廟廡語諸大夫曰朝議如聚訟喙  
持不相下士習日澆若何以教之語

子章曰多識往行德乃大畜誦詩讀書尚友千古彼躋躋翱翔殿廡者不知其人可乎君志之為諸生赤志子章曰太史公故有仲尼弟子列傳公曰亡多語曾遺一貫宰誤作亂孟與荀鄒同傳未可訓也子章曰薛武進

公近有四書人物考公曰弟子不載  
語孟者亡可考也子章退而稽之春  
秋史記叅之闕里譜牒上自

宣尼及門諸賢下泉漢唐宋元

明從祀諸儒次及我

朝幸學粹真諸儀共十二卷書成上

之掌故公卒業之名曰聖門人物志  
屬太原守趙君付之剞劂竊惟晉之  
為國延袤數千里民蕃政夥黃河一  
衣帶水與鹵只歲繕河上塞竒嵐鴈  
門投金繒博鹵馬旦夜且叵測晉代  
瀋三藩宗糈郡縣竭民脂髓供之日

不暇給邊氓剝悍慙忮芥三尺走灰  
地如鶩潞城機杼鬪巧織作純麗衣  
天下澤蒲之間輻湊雜屑浮食者多  
民公本飭末放効侈靡羞不相及公  
不急其急者而急所不必急奚也嗚  
呼夫人之不必急也者乃公所急也

正銜勒齊轡策先德法而後刑罰使  
民孝弟忠信乃在制挺撻秦楚之前  
孔門諸賢儒嘉言懿行具載是書辟  
之鄧林之枝夸條直暢湯谷之水灌  
滍泱莽鳥之宿舟子之游隨所擇耳  
諸生有如冉有之矛澹臺之劍公良

子之車也多士桓桓何憂于獫狁師  
友十乘分庭抗禮於諸侯王也何慮  
於強宗明至刑至政思仁恕樹德也  
何有於悍忮蠶績而蟹有匡范冠而  
蟬有綏且先王遺教其民猶存也何  
難於風移俗易希賢而賢希聖而聖

其精者以治身其緒餘土苴以為天下國家公之拳拳諸生也蓋先務哉  
趙簡子殺竇舜孔子將之晉至河而  
返作陂搯魏文侯師子夏客段干木  
過其閭未嘗不式也賢人是禮國人  
稱仁而秦不敢伐魏趙殘二士以却



聖魏禮二士以鳩宗其得失千里矣  
公居晉之鄙稽晉之故甫下車而志  
是編豈曰恣討論窮博靡之為兢兢  
將翅仲尼之轍受卜生之詩所延望  
諸生良厚鼓宮宮應鼓角角動諸生  
將何如酬公無徒令王薛司馬三子

者鼎足橫序也

萬曆癸巳嘉平八日山西提刑按察  
司按察使泰和郭子章謹序

欽差提督鴈門等關兼巡撫山西地方都  
察院右僉都御史魏 為巡撫地方  
事先談本院行提學道為

聖門後祀先賢先儒諸生往往有不悉其  
姓氏况于履歷行實孟子曰以友天  
下之善士為未足又尚論古之人是

將何以尚而友之欲責令學官採緝  
成書以為誦法者之助今據按察司  
郭按察使送到夙昔所緝

聖門人物志考據精詳刪削簡要留心聖  
學如此其于

國憲民風即舉而措之耳本院再四披

閱溪所嘆服思宜頒布學宮以廣資  
問學為此仰本府官吏照牌事理即  
將發去

聖門人物志一部督令學官再加校閱考  
正該府選擇善書人役謄寫刊刻應  
用紙價工食於商稅餘課內動支刷

印肆拾部送院撫屬各府州縣差人  
印刷分給各學仍將用過銀數冊報  
查考須至牌者

萬曆二十二年三月

日

聖門人物志

凡例

一孔子世家與孔子門人傳以司馬遷史記為主史記略者旁引諸書而獨於論語稍略者論語經生習聞也  
一家語七十四賢通典八十三賢史記七十七賢孔子曰受業身通者七十有七人皆異能之士也當以孔子為正今攷大明會典八十人除伯魚子思不在弟子列孟子未及門餘七十七人正與夫子論合學者多稱七十之徒亦槩言之耳

一史記云自顏回至公孫龍三十五人頗有年名及受業見于書傳自冉季至公西蒧其四十三人無年及不見書傳但紀其名于左今仍闕

一先賢先儒從祀次第及 啓聖公從祀俱依 大明會典尊 制也其昔祀而今黜如荀卿揚雄之類俱不傳一聖賢贊依史記索隱例內先賢者多出宋高宗筆先儒者多出宋儒筆其原無贊者補之

一先賢姓氏舊多錯誤有以複姓作單姓者如壤駟稱壤子石作稱石子之類有以單姓作複姓者如奚子稱奚



容之類大較複姓為多今悉釐正

一宰我非闕止子我公孫龍非堅白公孫龍今俱明正其誤

一穀梁子名赤又名俛巫馬期陳人一曰魯人之類今兩存之闕疑也

一曾與祀儀文廟最重附載於後不惟見本朝崇儒重道之意而考禮者亦有所鏡焉

聖門人物志目錄

卷一

孔子世家

卷二

四配

顏子

曾子

子思子

孟子

卷三

十哲上

閔子

冉子

端木子

仲子

卜子

卷四

十哲下

冉子

宰子

冉子

言子

顓孫子

卷五

先賢上

澹臺子明

宓子不齊

原子憲

公冶子長

南宮子括

公哲子哀

商子瞿

高子柴

漆雕子開

樊子須

司馬子耕

公西子赤

有子若

梁子鯁

巫馬子施

卷六

先賢下

冉子孺

顏子辛

伯子虔

曹子卹

冉子季

公孫子龍

漆雕子徒父

秦子商

漆雕子哆

顏子高

商子洋

壤駟子赤

任子不齊

石作子蜀

公良子孺

公子夏首

公子肩定

后子處

鄒子單

奚子容蒧

罕父子黑

顏子祖

榮子旂

句子井疆

左人子郢

秦子祖

鄭子國

縣子成

原子亢

公祖子句茲

廉子潔

燕子伋

叔仲子會

樂子赫

公西子輿如

狄子黑

邾子異

孔子忠

陳子亢

公西子蒧

琴子張

顏子之僕

步叔子乘

施子之常

秦子非

申子棖

顏子喈

卷七

先儒一

左子丘明

公羊子高

穀梁子赤

伏子勝

高常子生

毛子萇

盾子蒼

孔子安國

董子仲舒

杜子子春

卷八

先儒二

王子通

韓子愈



歐陽子脩

邵子雍

張子載

司馬子光

卷九

先儒三

程子頤

胡子安國

胡子瑗

楊子時

朱子熹

張子栻

呂子裨謙

陸子九淵

蔡子沉

真子德秀

許子衡

卷十

先儒四

薛子瑄

王子守仁

陳子獻章

胡子居仁

卷十一

啓聖祠

啓聖公孔氏

顏氏無繇

曾氏點

孔氏鯉

孟孫氏激公宜

程氏珦

朱氏松

蔡氏元定

卷十二

會典祀儀

先師孔子釋菜

啓聖祠祭儀

目錄終

聖門人物志卷一

山西按察司按察使後學郭子章編輯

太原府知府後學趙彥校正

陽曲縣知縣後學陶嘉璋

交城縣教諭後學彭憲範全校

孔子世家

孔子生魯昌平鄉陬邑其先宋人也曰孔防叔防叔生伯夏伯夏生叔梁紇紇取顏氏禱於尼丘魯襄公二十二年而孔子生生而首上圩頂因名丘字仲尼丘生而叔梁紇

卒葬於防山防山在魯東由是孔子疑其父墓處母諱之也孔子為兒嬉戲常陳俎豆設禮容母死乃殯五父之衢蓋其慎也邠人輓父之母誨孔子父墓然後往合葬於防焉孔子娶經季氏饗士孔子與往陽虎絀曰季氏饗士非敢饗子也孔子由是退年十七魯大夫孟釐子病且死誠其嗣懿子曰孔丘聖人之後滅於宋其祖弗父何始有宋而嗣讓厲公及正考父佐戴武宣公三命茲益恭故鼎銘云一命而僂再命而懼三命而俯循牆而走亦莫敢余侮饁於是粥於是以餉余曰其恭如是吾聞聖人之後雖不

當世必有達者今孔丘年少好禮其達者歟吾即沒若必  
師之及釐子卒懿子與南宮敬叔往學禮焉是歲季武子  
卒平子代立孔子貧且賤及長嘗為季氏史料量平嘗為  
司職吏而畜蕃息由是為司空已而去魯斥乎齊逐乎宋  
衛困於陳蔡之間於是反魯孔子長九尺有六寸人皆謂  
之長人而異之魯復善待由是反魯魯南宮敬叔言魯君  
曰請與孔子適周魯君與之一乘車兩馬一豎子俱適周  
問禮蓋見老子云辭去而老子送之曰吾聞富貴者送人  
以財仁者送人以言吾不能富貴竊仁人之號送子以言

曰聰明深察而近於死者好議人者也博辯廣大危其身者發人之惡者也為人子者母以有己為人臣者母以有己孔子自周反于魯弟子稍益進焉是時也晉平公淫六卿擅權東伐諸侯楚靈王兵燹陵轢中國齊大而近於魯魯小弱附於楚則晉怒附於晉則楚來伐不備於齊齊師侵魯魯昭公之二十年而孔子蓋年三十矣齊景公與晏嬰來適魯景公問孔子曰昔秦穆公國小處辟其霸何也對曰秦國雖小其志大處雖辟行中正身舉五穀爵之大夫起嚟紕之中與語三月授之以政以此取之雖王可也

其霸小矣景公說孔子年三十五而季平子與郈昭伯以  
鬪雞故得罪魯昭公昭公率師擊平子平子與孟氏叔孫  
氏三家共攻昭公昭公師敗奔於齊齊處昭公乾侯其後  
頃之魯亂孔子適齊高昭子家臣欲以通乎景公與齊  
太師語樂聞韶音學之三月不知肉味齊人稱之景公問  
政孔子孔子曰君君臣臣父父子子景公曰善哉信如君  
不君臣不臣父不父子不子雖有粟吾豈得而食諸他日  
又復問政於孔子孔子曰政在節財景公說將欲以尼谿  
田封孔子晏嬰進曰夫儒者滑稽而不可軌法倨傲自順



不可以為下崇喪遂哀破產厚葬不可以為俗游說乞貸  
不可以為國自大賢之息周室既衰禮樂缺有間今孔子  
盛容飾繁登降之禮趨詳之節累世不能殫其學當年不  
能究其禮君欲用之以移齊俗非所以先細民也後景公  
敬見孔子不問其禮異日景公止孔子曰奉予以季氏吾  
不能以季孟之間待之齊大夫欲害孔子孔子聞之景公  
曰吾老矣弗能用也孔子遂行及乎魯孔子年四十二魯  
昭公卒於乾侯定公立定公立五年夏季平子卒相子嗣  
立季栢子穿井得土缶中若羊問孔子云得狗孔子曰以

丘所問羊也丘問之木石之怪夔罔闕水之怪龍罔象土  
之怪墳羊吳伐越墮會稽得骨節專車吳使使問孔子骨  
何者最大孔子曰禹致群神於會稽山防風氏後至禹殺  
而戮之其節專車此為大矣吳客曰誰之孔子曰山川  
之神足以綱紀天下其守為神社稷山川皆屬於王者  
客曰防風何守孔子曰汪罔氏之國有封禺之山為釐姓  
在虞夏商為汪罔於周為長翟今謂之大人客曰人長幾  
何孔子曰焦僈氏三尺短之至也長者不過十數之極也  
於是吳客曰善哉聖人相子嬖臣曰仲梁懷與陽虎有隙

陽虎欲逐懷公山不狃止之其秋懷益驕陽虎執懷析子  
怒陽虎因囚栢子與盟而醕之陽虎由此益輕季氏季氏  
亦僭於公室陪臣執國政是以魯自大夫以下皆僭離於  
正道故孔子不仕退而脩詩書禮樂弟子彌衆至自遠方  
莫不受業焉定公八年公山不狃不得意於季氏因陽虎  
為亂欲廢三桓之適更立其庶孽陽虎素所善者遂執季  
栢子栢子詐之得脫定公九年陽虎不勝奔於齊是時孔  
子年五十公山不狃以費畔季氏使人召孔子孔子循道  
彌久溫溫無所試莫能已用曰蓋周文武起豐鎬而王今

費雖小儻庶幾乎欲往子路不說止孔子孔子曰夫召我者豈徒哉如用我其為東周乎然亦卒不行其後定公以孔子為中都宰一年四方皆則之由中都司空由司空為大司寇定公十年春及齊平夏齊侯會於夾谷公曰魯用孔丘其勢危齊乃使使告齊齊侯會於夾谷魯定公且以乘車好往孔子攝相事曰臣聞有文事者必有武備有武事者必有文備古者諸侯出疆必具官以從請具左右司馬定公曰諾具左右司馬會齊侯夾谷為壇位土階三等以會遇之禮相見揖讓而登獻酬之禮畢齊

有司趨而進曰請奏四方之樂景公曰諾於是旌旄羽袂  
矛戟劍撥鼓噪而至孔子趨而進歷階而登不盡一等舉  
袂而言曰吾兩君為好會夷狄之樂何為於此請命有司  
有司却之不去則左右視晏子與景公景公心忤麾而去  
之有頃齊有司趨而進曰請奏宮中之樂景公曰諾優倡  
侏儒為戲而前孔子趨而進歷階而登不盡一等曰匹夫  
而榮惑諸侯者罪當誅請命有司有司加法焉手足異處  
景公懼而動知義不若歸而大恐告其群臣曰魯以君子  
之道輔其君而子獨以夷狄之道教寡人使得罪於魯君

為之柰何有司進對曰君子有過則謝以質小人有過則謝以文君若悼之則謝以實於是齊侯乃歸所侵魯之郛汶陽龜陰之田以謝過定公十三年夏孔子言於定公曰臣無藏甲大夫毋雉之城今三家過制請損之使仲由為季氏宰將墮三都於是叔孫氏先墮郈季氏將墮費公山不狃叔孫輒率費人襲魯公與三子入於季氏之宮登武子之臺費人攻之弗克入及公側孔子命申句須樂頎下伐之費人北國人追之敗諸姑蔑二子奔齊遂墮費將墮成公歛處父謂孟孫曰墮成齊人必至于北門且成孟

氏之保鄆無成是無孟氏也我將弗墮十二月公圍成弗  
克定公十四年孔子年五十六由大司寇行攝相事有喜  
色門人曰聞君子禍至不懼福至不喜孔子曰有是言也  
不曰樂其以貴下人乎於是誅魯大夫亂政者少正卯與  
聞國政三月粥羔豚者弗飾賈男女行者別於塗塗不拾  
遺四方之客至乎邑者不求有司皆予之以歸齊人聞而  
懼曰孔子為政必霸霸則吾地近焉我之爲小矣盍致  
地焉犁鉏曰請先嘗沮之沮之而不可致也庸遲乎於  
是選齊國中女子好者八十人皆衣文衣而舞康樂文馬

三十駟遺魯君陳女樂文馬於魯城南高門外季栢子微服往觀再三將受乃語魯君為周道將往觀終日怠於政事子路曰夫子可以行矣孔子曰魯今且郊如致膳于大夫則吾猶可以止栢子卒受齊女樂三日不聽政郊又不致膳俎於大夫孔子遂行宿乎屯而師已送曰夫子則非罪孔子曰吾歌可夫歌曰彼婦之口可以出走彼婦之謁可以死敗益優哉游哉維以卒歲師已反栢子曰孔子亦何言師已以實告栢子喟然嘆曰夫子罪我以群婢故也夫孔子遂適衛主於子路妻兄顏濁鄒家衛靈公問孔子



居魯得祿幾何對曰奉粟六萬衛人亦致粟六萬居頃之  
或譖孔子於衛靈公靈公使公孫余假一出入孔子恐  
獲罪焉居十月去衛將適陳過匡顏刻為僕以其策指之  
曰昔吾入此由彼闕也匡人聞之以為魯之陽虎陽虎嘗  
暴匡人匡人於是遂止孔子孔子狀類陽虎拘焉五日顏  
淵後子曰吾以汝為死矣顏淵曰子在回何敢死匡人拘  
孔子益急弟子懼孔子曰文王既沒文不在茲乎天之將  
喪斯文也後死者不得與于斯文也天之未喪斯文也匡  
人其如予何孔子使從者為甯武子臣於衛然後得去去

即過蒲月餘反乎衛主蘧伯玉家靈公夫人有南子者使人謂孔子曰四方之君子不辱欲與寡君為兄弟者必見寡小君寡小君願見孔子辭謝不得已而見之夫人在絺帷中孔子入門北面稽首夫人自帷中再拜環珮玉聲璆然孔子曰吾鄉為弗見見之禮荅焉子路不說孔子矢之曰予所不者天厭之天厭之居衛月餘靈公與夫人同車宦者雍渠參乘出使孔子為次乘招搖市過之孔子曰吾未見好德如好色者也於是醜之去衛過曹是歲魯定公卒孔子去曹適宋與弟子習禮大樹下宋司馬相雅欲殺

孔子拔其樹孔子去弟子曰可以速矣孔子曰天生德於予桓魋其如予何孔子適鄭與弟子相失孔子獨立郭東門鄭人或謂子貢曰東門有人其頽似堯其項類臯陶其肩類子產然自腰以下不及禹三寸纍纍若喪家之狗子貢以實告孔子孔子欣然笑曰形狀末也而似喪家之狗然哉然哉孔子遂至陳主於司城貞子家歲餘吳王夫差伐陳取三邑而去趙鞅伐朝歌楚圍蔡蔡遷于吳吳敗越王勾踐會稽有隼集于陳廷而死楷矢貫之石砮矢長尺有咫陳湣公使使問孔子孔子曰隼來遠矣此肅慎之矢

也昔武王克商通道九夷百蠻使各以其方賄來貢使無  
忘職業於是肅慎貢楷矢石磐長尺有咫先王欲昭其令  
德以肅慎矢分大姬配虞胡公而封諸陳分同姓以珍玉  
展親分異姓以遠方職使無忘服故分陳以肅慎矢試求  
之故府果得之孔子居陳三歲會晉楚爭彊更伐陳及吳  
侵陳陳常被寇孔子曰歸與歸與吾黨之小子狂簡進取  
不忘其初於是孔子去陳過蒲會公叔氏以蒲畔蒲人止  
孔子弟子有公良孺者以私車五乘從孔子其為人長賢  
有勇力謂曰吾昔從夫子遇難於匡今又遇難於此命也

已吾與夫子再罹難寧闕而死闕甚疾蒲人懼謂孔子曰  
苟毋適衛吾出子與之盟出孔子東門孔子遂適衛子貢  
曰盟可負耶孔子曰要盟也神不聽衛靈公聞孔子來喜  
郊迎問曰蒲可伐乎對曰可靈公曰吾大夫以為不可今  
蒲衛之所以待晉楚也以衛伐之無乃不可乎孔子曰其  
男子有死之志婦人有保西河之志吾所伐者不過四五  
人靈公曰善然不伐蒲靈公老怠於政不用孔子孔子喟  
然歎曰苟有用我者暮月而已三年有成孔子行佛盼為  
中牟宰趙簡子攻范中行伐中牟佛盼畔使人召孔子孔

子欲往子路曰由聞諸夫子其身親為不善者君子不入也今佛胥親以中牟畔子欲往如之何孔子曰有是言也不曰堅乎磨而不磷不曰白乎涅而不淄我豈匏瓜也哉焉能繫而不食孔子擊磬有荷蕢而過門者曰有心哉擊磬乎硜硜乎莫已知也夫而已矣孔子與鼓琴師襄子十日不進師襄子曰可以益矣孔子曰丘已習其曲矣未得其數也有間曰已習其數可以益矣孔子曰丘未得其志也有間曰已習其志可以益矣孔子曰丘未得其為人也有間曰有所穆然深思焉有所怡然高望而遠志焉曰丘

得其為人黯然而黑幾然而長眼如望羊心如王四國非  
文王其誰能為此也師襄子辟席再拜曰師蓋云文王操  
也孔子既不得用於衛將西見趙簡子至於河而聞竇鳴  
犢舜華之死也臨河而嘆曰美哉水洋洋乎丘之不濟此  
命也夫子貢趨而進曰敢問何謂也孔子曰竇鳴犢舜華  
晉國之賢大夫也趙簡子未得志之時湏此兩人而後從  
政及其已得志殺之乃從政丘聞之也刳胎殺夭則麒麟  
不至郊竭澤涸漁則蛟龍不合陰陽覆巢毀卵則鳳皇不  
翔何則君子諱傷其類也夫鳥獸之於不義也尚知辟之

而况乎丘哉乃還息乎陬鄉作為陬操以哀之而反乎衛  
入主蘧伯玉家他日靈公問兵陳孔子曰俎豆之事則嘗  
聞之軍旅之事未之學也明日與孔子語見蜚鴈仰視之  
色不在孔子孔子遂行復如陳夏衛靈公卒立孫輒是為  
衛出公六月趙鞅內太子蒯聵于戚陽虎使太子統八人  
衰經偽自衛迎者哭而入遂居焉冬蔡遷于州來是歲魯  
哀公三年而孔子年六十矣齊助衛圍戚以衛太子蒯聵  
在故也夏魯栢釐廟燔南宮敬叔救火孔子在陳聞之曰  
災必於栢釐廟乎已而果然秋季栢子病釐而見魯城喟



然嘆曰昔此國幾與矣以吾獲罪於孔子故不興也顧謂其嗣康子曰我即死若必相魯相魯必召仲尼後數日相子卒康子代立已葬欲召仲尼公之魚曰昔吾先君用之不終終為諸侯笑今又用之不能終是再為諸侯笑康子曰則誰召而可曰必召冉求於是使使召冉求冉求將行孔子曰魯人召求非小用之將大用之也是日孔子曰歸乎歸乎吾黨之小子狂簡斐然成章吾不知所以裁之子贛知孔子思歸送冉求因誡曰即用以孔子為招云冉求既去明年孔子自陳遷于蔡蔡昭公將如吳吳召之也前

昭公欺其臣遷州來後將往大夫懼復遷公孫翩射殺昭公楚侵蔡秋齊景公卒明年孔子自蔡如葉葉公問政孔子曰政在來遠附通他日葉公問孔子於子路子路不對孔子聞之曰由爾何不對曰其爲人也學道不倦誨人不厭發憤忘食樂以忘憂不知老之將至云爾去葉反于蔡長沮桀溺耦而耕孔子以爲隱者使子路問津焉長沮曰彼執輿者爲誰子路曰爲孔丘曰是魯孔丘與曰然曰是知津矣桀溺謂子路曰子爲誰曰爲仲由曰子孔丘之徒與曰然桀溺曰滔滔者天下皆是也而誰以易之且與其

從辟人之士豈若從辟世之士哉。輟而不輟。子路以告孔子。孔子憮然曰。鳥獸不可與同群。天下有道。丘不與易也。他日子路行遇荷蓀丈人曰。子見夫子乎。丈人曰。四體不勤。五穀不分。孰爲夫子。植其杖而芸。子路以告孔子曰。隱者也。復往則亡孔子。還于蔡。三歲。吳伐陳。楚救陳。軍于城父。聞孔子在陳蔡之間。楚使人聘孔子。孔子將往。拜禮。陳蔡大夫謀曰。孔子賢者所刺譏。皆中諸侯之疾。今者又留陳蔡之間。諸大夫所設行。皆非仲尼之意。今楚大國也。來聘孔子。孔子用於楚。則陳蔡用事大夫危矣。於是乃相與

發徒役圍孔子於野不得行絕糧從者病莫能與孔子講  
誦弦歌不衰子路愠見曰君子亦有窮乎孔子曰君子固  
窮小人窮斯濫矣子貢色作孔子曰賜爾以予為多學而  
識之者與曰然非與孔子曰非也予一以貫之孔子知弟  
子有愠心乃召子路而問曰詩云匪兕匪虎率彼曠野吾  
道非耶吾何為於此子路曰意者吾未仁耶人之不我信  
也意者吾未知耶人之不我行也孔子曰有是乎由譬使  
仁者而必信安有伯夷叔齊使智者而必行安有王子比  
干子路出于貢入見孔子曰賜詩云匪兕匪虎率彼曠野

吾道非耶吾何為於此子貢曰夫子之道至大也故天下  
莫能容夫子夫子盍少貶焉孔子曰賜良農能稼而不能  
為穡良工能巧而不能為順君子能修其道綱而紀之統  
而理之而不能為容今爾不修爾道而求為容賜而志不  
遠矣子貢出顏回入見孔子曰回詩云匪兕匪虎率彼曠  
野吾道非耶吾何為於此顏回曰夫子之道至大故天下  
莫能容雖然夫子推而行之不容何病不容然後見君子  
夫道之不修也是吾醜也夫道既已大修而不用是有國  
者之醜也不容何病不容然後見君子孔子欣然而笑曰

有是哉顏氏之子使爾多財吾為爾宰於是使子貢至  
楚昭王與師迎孔子然後得免昭王將以書社地七百里  
封孔子楚令尹子西曰王之使使諸侯有如子貢者乎曰  
無有王之輔相有如顏回者乎曰無有王之將率有如子  
路者乎曰無有王之官尹有如宰予者乎曰無有且楚之  
祖封於周號為子男五十里今孔丘述三王之法明周召  
之業王若用之則楚安得世世堂堂方數千里乎夫文王  
在豐武王在鎬百里之君卒王天下今孔丘得據土壤賢  
弟子為佐非楚之福也昭王乃止其秋楚昭王卒于城父

楚狂接輿歌而過孔子曰鳳兮鳳兮何德之衰往者不可  
諫兮來者猶可追也已而已而今之從政者殆而孔子下  
欲與之言趨而去弗得與之言於是孔子自楚反乎衛是  
歲也孔子年六十三而魯哀公六年也其明年吳與魯會  
繒徵百牢大宰嚭召季康子康子使子貢往然後得已孔  
子曰魯衛之政兄弟也是時衛君輒父不得立在外諸侯  
數以為讓而孔子弟子多仕於衛衛君欲得孔子為政子  
路曰衛君待子而為政子將奚先孔子曰必也正名乎子  
路曰有是哉子之迂也何其正也孔子曰野哉由也夫名

不正則言不順言不順則事不成事不成則禮樂不興禮  
樂不興則刑罰不中刑罰不中則民無所錯手足矣夫君  
子為之必可名言之必可行君子於其言無所苟而已矣  
其明年冉有為季氏將師與齊戰於郎克之季康子曰子  
之於軍旅學之乎性之乎冉有曰學之於孔子季康子曰  
孔子何如人哉對曰用之有名播之百姓質諸鬼神而無  
憾求之至於此道雖累千社夫子不利也康子曰我欲召  
之可乎對曰欲召之則毋以小人固之則可矣而衛孔文  
子將攻太叔問策於仲尼仲尼辭不知退而命載而行曰



鳥能擇木木豈能擇鳥乎文子固止會季康子逐公華公  
賓公林以幣迎孔子孔子歸魯孔子之去魯凡十四歲而  
反乎魯魯哀公問政對曰政在選臣季康子問政曰舉直  
錯諸枉則枉者直康子患盜孔子曰苟子之不欲雖賞之  
不竊然魯終不能用孔子孔子亦不求仕孔子之時周室  
微而禮樂廢詩書缺追迹三代之禮序書傳上紀唐虞之  
際下至秦繆編次其事曰夏禮吾能言之杞不足徵也殷  
禮吾能言之宋不足徵也足則吾能徵之矣觀殷夏所損  
益曰後雖百世可知也以一文一質周監二代郁郁乎文

我吾從周故書傳禮記自孔氏孔子語魯太師樂其可知也始作翕如縱之純如皦如繹如也以成吾自衛反魯然後樂正雅頌各得其所古者詩三千餘篇及至孔子去其重取可施於禮義上采契后稷中述殷周之盛至幽厲之缺始於衽席故曰關雎之亂以為風始鹿鳴為小雅始文王為大雅始清廟為頌始三百五篇孔子皆弦歌之以求合韶武雅頌之音禮樂自此可得而述以備王道成六藝孔子晚而喜易序彖繫象說卦文言讀易韋編三絕曰假我數年若是我於易則彬彬矣孔子以詩書禮樂教弟子

蓋三千焉身通六藝者七十有二人如顏濁鄒之徒頗受業者甚衆孔子以四教文行忠信絕四母意母必母固母我所慎齊戰疾子罕言利與命與仁不憤不啓舉一隅不以三隅反則弗復也其於鄉黨恂恂似不能言者其於宗廟朝廷辯辯言唯謹爾朝與上大夫言闇闇如也與下大夫言侃侃如也入公門鞠躬如也趨進翼如也君召使饋色勃如也君命召不俟駕行矣魚餕肉敗割不正不食席不正不坐食於有喪者之側未嘗飽也是日哭則不歌見齊衰鵻者雖童子必變三人行必得我師德之不修學之

不講聞義不能徙不善不能改是吾憂也使人歌善則使  
復之然後和之子未語怪力亂神子貢曰夫子之文章可  
得聞也夫子言天道與性命弗可得聞也已顏淵喟然嘆  
曰仰之彌高鑽之彌堅瞻之在前忽焉在後夫子循循然  
善誘人情我之文約我以禮欲罷不能既竭我才如有所  
立卓爾雖欲從之末由也已達巷黨人童子曰大哉孔子  
博學而無所成名子聞之曰我何執執御乎執射乎我執  
御矣牢曰子云不試故藝魯哀公十四年春狩大野叔孫  
氏車子鉏商獲獸以為不祥仲尼視之曰麟也取之曰河

不出圖雖不出書吾已矣夫顏淵死孔子曰天喪予及西  
狩見麟曰吾道窮矣喟然嘆曰莫知我夫子貢曰何為莫  
知子子曰不怨天不尤人下學而上達知我者其天乎不  
降其志不辱其身伯夷叔齊乎謂桀下惠少連降志辱身  
矣謂虞仲夷逸隱居放言行中清廢中權我則異於是無  
可無不可子曰弗乎弗乎君子病沒世而名不稱焉吾道  
不行矣吾何以自見於後世哉少因史記作春秋上至隱  
公下訖哀公十四年十二公據魯親周故廢運之三代約  
其文辭而精博故吳楚之君自稱王而春秋貶之曰子踐

上之會實召周天子而春秋諱之曰天王狩於河陽推此類以繩當世貶損之義後有王者舉而聞之春秋之義行則天下亂臣賊子懼焉孔子在位聽訟文辭有可與人共者弗獨有也至於為春秋筆則筆削則削子夏之徒不能贊一辭弟子受春秋孔子曰後世知丘者以春秋而罪丘者亦以春秋明歲子路死於衛孔子病子貢請見孔子方負杖逍遙於門曰賜汝來何其晚也孔子因嘆歌曰太山壞乎梁柱摧乎哲人萎乎因以涕下謂子貢曰天下無道久矣莫能宗子夏人殞於東階周人於西階殷人兩柱間

昨暮予夢生奠兩柱之間予殆殷人也後七日卒孔子年七十三以魯哀公十六年四月己丑卒哀公誄之曰旻天不弔不愍遺一老俾屏余一人以在位烝烝余在疚嗚呼哀哉尼父母自律子貢曰君其不沒于魯乎夫子之言曰禮失則昏名失則愆失志為昏失所為愆生不能用死而誄之非禮也稱余一人非名也孔子葬魯城北泗上弟子皆服三年三年心喪畢相訣而去則哭各復盡哀或復留唯子貢廬於冢上凡六年然後去弟子及魯人往從冢而家者百有餘室因命曰孔里魯世世相傳以歲時奉祠孔

子冢而諸儒亦講禮鄉飲大射於孔子冢孔子冢大一頃  
故所居堂弟子內後世因廟藏孔子衣冠琴車書至於漢  
二百餘年不絕孔子生鯉字伯魚伯魚生伋字子思伯魚  
子思別有傳子思生白字子上齊威王兩召為國相不就  
年四十九生子求字子家楚召不就年四十五生子箕字  
子京為魏相年四十六生子穿字子高楚魏趙三國交聘  
不就著儒家之語十三篇名曰諠言年五十一生子謙史  
記作慎字子順又名斌仕魏為安釐王相秦莊襄王召不  
行魏以孔子後嗣封魯文信君年五十七孔叢子云冢之



族胤一子相承以至九世始生子三鮒騰樹鮒字子魚一  
字甲秦始皇召為魯國文通君拜少傅李斯議焚書鮒與  
弟騰子襄藏其家語論語尚書孝經等于祖堂舊壁中自  
隱於蒿山教弟子百餘人後陳涉為楚王聘為太傅凡仕  
六月託疾而退卒于陳下年五十七著書二十餘篇記先  
聖及子思子上子高子順與已行事名曰孔叢子子隨字  
元路四傳至吉吉生何齊皆承殷後為宋公嗣絕弟騰字  
子襄長九尺六寸漢高帝過魯以太牢祀孔子封子襄為  
奉祀君後為惠帝博士遷長沙太守年五十七生子忠字

子貞有高尚之志徵為博士褒成侯年五十七生子二武  
及安國武字子威為文帝博士至臨淮太守生子延年武  
帝時為博士轉少傅遷大將軍年七十一生子霸字次儒  
昭帝時為博士宣帝時以太中大夫祿太子經遷詹事  
為高密相元帝即位拜太師賜爵關內侯食邑八百戶號  
褒成君霸上書求奉先聖祭詔令以所食邑祀孔子還子  
福名數于魯年七十二卒於第贈列侯諡曰烈君生子四  
福捷喜光福襲封關內侯年六十二生子房襲封關內侯  
生子均字長平徵拜尚書郎平帝元始元年更封褒成侯

食邑二千戶追謚孔子曰褒成宣尼公五年王莽篡位拜太尉不就年八十一生子志後漢光武帝拜大司馬建武十四年襲封褒成侯食邑二千戶卒謚元成生子損字君益明帝永平十五年襲封褒成侯章帝元和二年春帝東巡狩還過魯幸闕里以太牢祠孔子及七十二人大會孔氏男子二十以上者六十三人命儒者講論語和帝永元四年襲封褒亭侯食邑一千戶生子曜字君曜襲封褒亭侯生子完襲封褒亭侯早卒無子以母弟讚之子羨襲封羨字子餘魏文帝黃初元年拜議郎封宗聖侯以魯縣百

戶奉祀生子震字伯起晉武帝泰始三年改封奉聖亭侯  
拜太常卿黃門侍郎食邑二千戶年七十五生子嶷字功  
成襲封奉聖亭侯食邑二千戶年五十七生子撫舉孝廉  
辟太尉掾襲封奉聖亭侯為豫章太守食邑一千戶生子  
懿東晉襲封奉聖亭侯從事中郎食邑一千戶年六十一  
生子鮮字鮮之宋文帝元嘉十九年襲封奉聖亭侯改封  
崇聖侯生子秉字敬山後魏舉孝廉文帝延興三年封崇  
聖大夫食邑五百戶仍詔孔氏四人為官太和十六年改  
謚孔子為文聖尼父乘生子靈珍秘書郎十九年仍封

崇聖侯食邑一千戶生子文泰襲封崇聖侯食邑一千戶  
年五十八生子渠襲封崇聖侯北齊文宣帝天保元年改  
封恭聖侯後周靜帝大象二年改封鄒國公食邑一千戶  
是年進封孔子為鄒國公梁生子長孫襲封鄒國公食邑  
一千戶年六十四生子英愬嗣愬英愬封奉聖侯無子嗣  
愬隋文帝時應制登科授涇州司兵叅軍遷太子通事舍  
人襲封鄒國公煬帝大業四年改封紹聖侯食邑一千戶  
年七十生子德倫唐高祖武德九年改封襲聖侯太宗貞  
觀二年陞孔子為先聖十一年尊孔子為宣父是年詔朝

會位同三品食邑一千戶高宗乾封元年追贈孔子為太  
師則天天授元年封孔子為隆道公賜勅書及時服年七  
十一生子崇基中宗嗣聖十二年襲封褒聖侯神龍元年  
五月制授朝散大夫陪祭朝會年五十六生子璵之字藏  
暉玄宗開元五年襲封褒聖侯特授四門博士郡王府文  
學蔡州長史二十七年改封文宣公兼除兗州長史遷都  
水使者食邑一千戶是年追謚孔子為文宣王生子瑩龍  
封文宣公兼兗州泗水令生子齊卿德宗建中三年襲封  
文宣公兼除兗州功曹叅軍轉青州司兵叅軍時遭叛亂

陷于東平生子惟晁憲宗元和十三年舉平兵解歸魯授  
兗州叅軍襲封文宣公年六十五生子策明經及第歷少  
府監主簿國子監丞襲封文宣公遷國子尚書博士宣宗  
大中元年宰相白敏中奏復百縑充年五十七生子  
振字國文懿宗咸通四年狀元及第除秘書省校書郎歷  
運判監察御史左補闕水部員外郎襲封文宣公賜百縑  
年七十四生子昭儉任南陵尉授廣文館博士兗州司馬  
賜緋除秘書郎襲封文宣公累宰曲阜年六十生子光嗣  
齊郎出身哀帝天祐二年授泗水令陵廟主年四十二為

洒掃戶孔末所害生子仁玉字溫如初孔末既害光嗣自  
為曲阜令時仁玉生始九月母張氏抱歸育于外家後魯  
人見其長訴于官事聞于朝乃罷末以仁玉為先聖嗣身  
長七尺姿貌異常唐時年九歲任曲阜主簿陞縣令襲封  
文宣公後周太祖廣順二年賜五品服銀器雜絲復口授  
曲阜縣令兼監察御史年四十五贈兵部尚書孔氏苗裔  
幾絕而復續為中興祖生子四宜憲冕勛宜字不疑宋大  
祖乾德四年請闕上書述其家世詔為曲阜主簿調黃州  
軍事推官太宗召見遷司農寺丞領關市於星子鎮陞為



縣令轉運使遷太子右贊善大夫襲封文宣公遷殿中丞  
雍熙二年太宗北征受詔督軍餉涉巨馬河卒年四十六  
生子三延世延澤延渥延世字茂先以父歿邊境特賜同  
學究出身授曲阜主簿秩滿授福州閩縣令許州長葛令  
真宗即位召見詢以家門故事授曲阜令襲封文宣公而  
賜束帛銀器及太宗御書并九經等書咸平三年奉勅許  
於廳上見知通轉運使特削趨庭禮貴公爵也卒于官年  
三十八生子聖佑太宗祥符元年授太常寺奉禮郎是年  
加謚孔子為玄聖文宣王四年以聖佑為大理評事五年

改封孔子為至聖文宣王天禧五年襲封文宣公知仙源  
縣事遷贊善大夫年三十五無嗣以親堂弟宗愿承襲宗  
愿延澤子也字子莊仁宗天聖中補太廟齋郎寶元二年  
授國子監主簿襲封文宣公知仙源縣事至和二年改封  
衍聖公累遷尚書比部員外郎年六十三生子四長若蒙  
字公明神宗熙寧元年襲封衍聖公哲宗元祐元年改封  
奉聖公坐事廢以弟若虛承襲若虛字公實哲宗元符元  
年襲封奉聖公卒朝廷以若蒙子端友承襲端友字子交  
徽宗崇寧三年封衍聖公建炎初扈從高宗南渡寓三衢

終知郴州生子玠端操端友弟權襲封衍聖公於魯玠字  
錫老高宗紹興二年襲封衍聖公于衢生子搢璠字文老  
端操第二子襲封衍聖公于魯年三十八金熙宗天眷三  
年贈榮祿大夫生子二搢搢搢字秀紳高宗紹興二十四  
年襲封衍聖公于衢生子文遠搢字元濟金熙宗皇統二  
年襲封衍聖公管勾祀事年二十六無嗣以弟搢承襲搢  
字元會金世宗大定三年襲封衍聖公管勾祀事年五十  
三贈光祿大夫生子元搢文遠字紹先襲封衍聖公於衢  
生子萬春元搢字夢得金章宗明昌二年襲封衍聖公管

勾祀事哀帝正大二年授知集賢院兼太常丞天興元年  
改除遙懷泰定軍節度使二年遷光祿大夫尋改授太常  
卿無子以姪之固子湏繼之固元從母弟元統子也無子  
自端操至湏六世嗣絕若蒙魚若愚生子端立立生琥琥  
生拂拂生子長元孝次元用字後卿禔襲封衍聖公生  
子之全萬壽字耆年襲封衍聖公子衢生子洙元孝子之  
厚贈亞中大夫濟寧路總管輕車都尉魯郡侯生子浣之  
全字工升嘗攝祀事充曲阜令生子治洙字景清襲封衍  
聖公子衢元世祖至元十九年辭爵授國子祭酒提舉浙

東道學校事卒無子自端友至洙凡六世因正嗣絕南始  
罷封浣字日新贈中議大夫太常禮儀院同僉上騎都尉  
追封東平郡伯再贈通議大夫禮部尚書上輜車都尉追  
封魯郡侯生子思晦治字世安成宗元貞初特授襲封子  
思誠罷封大德十一年加封孔子為大成至聖文宣王思  
晦字明道武宗至大中以死縣寧陽兩縣教諭仁宗延祐  
三年授中議大夫襲封衍聖公泰定四年改嘉議大夫卒  
贈通奉大夫河南江北等處行中書省叅知政事諡寧年  
六十七追封魯郡公謚文肅生子克堅字璟夫性敏學博

詞允精樂府元至元元年襲封衍聖公至正八年  
章擢太常卿治書侍御史山東廉訪使集賢直學士禮  
部尚書西臺侍御史國子祭酒北魏不樂居朝謝病歸復  
起力辭二十六年太祖手詔趣入朝待以賓禮不名不  
煩以政郊社致禘歲致祿上召見面諭守先訓曰爾福  
人也洪武元年詔孔氏子孫襲封衍聖公并世襲知縣並  
如前代舊制三年克堅疾告遣中使日再存問疾篤詔乘  
傳還賜白金雜絲行至邳新安驛卒年五十五生子九人  
皆有行誼長希學字士行襲封衍聖公朝京師上問歷

代治理條對甚悉 上喜賜雜綵即命還守祖庭賜屬官  
管勾典籍司樂各一人希學歲入朝賜與稠疊元旦之朝  
特命班亞上相祖庭兵後廊廡圯壞祭田荒蕪官賦煩迫  
希學條請復故又請備禮器樂器樂舞儀式年四十七生  
子訥字言伯篤學恭謹能詩書工篆法律身嚴恪始終不  
渝洪武十六年外艱以 中宮崩赴京祭于 孝陵竣事  
入見 上顧謂廷臣曰孔訥真聖人子孫也館于太學遣  
尚書劉仲質勞問日繼庖廩復賜衣服鈔錠充物館舍十  
七年正月朝京師襲封衍聖公明日入謝復賜襲衣宴禮

司吏部擬詰用資善大夫階 上曰既爵公勿事散官但  
詰以織文玉軸為異耳遂著為令每歲入覲得給符乘傳  
班序文臣首年四十三生子公鑑字昭文生而岐嶷長益  
端謹建文二年年二十一襲封衍聖公四年卒 成祖初  
即位遣使諭祭年二十三以疾卒生子彥縉字朝紳名字  
皆 仁宗所命蚤孤母胡夫人教育之永樂八年襲封衍  
聖公 上觀其言動進退從容喜謂侍臣曰真聖人裔也  
館之太學歸讀祖書不懈洪熙元年賜第東安門北景泰  
二年 上幸太學特召率三氏子孫 賜冠帶錦衣越



三年朝會賜三臺銀玉帶麒麟服年五生子承慶年  
六歲遭母夏夫人喪奉父及繼母盡孝長從三氏學錄  
族祖孔克宴學所著有禮廷吟藁行於世未襲爵而卒景  
泰六年贈襲封衍聖公生子二弘緒弘泰緒字以敬早失  
怙年八歲景皇召見賜冠服於東角門景泰六年襲封  
衍聖公賜玉帶以軀小去二銖授之俾藏焉又賜金謹禮  
崇德圖書勅族人共保護之英宗復昨入朝召見便殿  
上握其手置膝上與語久之以賜第數畝又賜大宅弘  
緒嘗奏給三氏教授印開生昌氏田租十七

成化六年坐事削爵廷議世嫡相傳古今通義請如宋若  
蒙若虛故事命其弟弘泰襲封後仍歸其子弘治十一年  
巡按御史上言弘緒改過乞復爵上與冠服家居弘泰  
字以和成化六年襲封衍聖公弘泰美風儀善議論每評  
騭人曲直料事當成敗多奇中憲宗見弘泰束玉帶遣  
人問曰二品焉得玉帶束乎對曰臣家門故事累朝恩數  
不敢廢也十三年加廟祭禮樂率族人奉表入謝弘泰嗣  
公三十有四年而卒弘緒子聞韶字知德弘治十六年襲  
封衍聖公國初詔正諸神封號惟孔子封爵特仍其舊

令天下儒學每歲仲春秋上丁通祀孔子永樂八年正文  
廟聖賢繪塑衣冠令合古制正統三年禁祀孔子釋老宮  
嘉靖九年從輔臣張璁議釐正孔子祀典始為木主改大  
成至聖文宣王為至聖先師孔子

贊曰孔子之先胄于商國弗父能讓正考銘勒防叔求奔  
邠人倚立尼丘誕聖闕里生德七十升堂四方取則行誅  
兩觀攝相夾谷歎鳳遠袞泣麟何促九流仰鏡萬古欽躅